



**Technoleg Iechyd Cymru**  
**Health Technology Wales**

## **Mynychu cyfarfod Panel Arfarnu Technoleg Iechyd Cymru**

Mae Technoleg Iechyd Cymru (HTW) yn croesawu aelodau'r cyhoedd yng nghyfarfodydd ein Panel Arfarnu.

Er mwyn eich helpu i ddeall trefn ein cyfarfodydd a gynhelir yn gyhoeddus rydym wedi casglu ynghyd rai cwestiynau cyffredin ac atebion iddynt. Gobeithio y bydd y wybodaeth hon yn ddefnyddiol ac y bydd yn eich helpu i ddeall sut mae HTW yn gweithio i geisio diwallu anghenion pobl Cymru o ran gwneud y defnydd gorau o dechnolegau iechyd yn y GIG.

Os oes gennych unrhyw gwestiynau yn ystod y cyfarfod sgwrsiwch â chydlynnydd y cyfarfod yn y man cyntaf.

### **Beth yw Technoleg Iechyd Cymru?**

Corff cenedlaethol sy'n gweithio i wella ansawdd gofal yng Nghymru yw Technoleg Iechyd Cymru (HTW). Rydym yn cydweithio â phartneriaid ar draws y sectorau iechyd, gofal cymdeithasol a thechnoleg i sicrhau dull Cymru gyfan. Cawn ein cyllido gan Lywodraeth Cymru ac fe'n lletyir gan GIG Cymru, ond rydym yn annibynnol ar y ddau.

Rydym yn asesu technolegau iechyd a gofal nad sy'n feddyginiaeth ac yn cyhoeddi canllawiau awdurdodol ac annibynnol yn seiliedig ar y dystiolaeth a'r arbenigedd gorau sydd ar gael. Rydym yn arfarnu technolegau drwy gydol eu cylch oes, o arloesedd hyd ddarfodoldeb.

Mae ein gwaith yn llywio'r broses comisiynu gan GIG Cymru a darparwyr gofal ac yn cefnogi gwneuthurwyr penderfyniadau i wneud penderfyniadau a hysbysir gan dystiolaeth ynglŷn â buddsoddiadau a dadfuddsoddiadau technoleg.

Mae ein cylch gwaith yn cwmpasu unrhyw dechnoleg iechyd nad sy'n feddyginiaeth, megis dyfeisiau meddygol, gweithdrefnau llawdriniaethol, therapiau seicolegol, telefonitro neu adsefydlu. Asesir meddyginiaethau o fewn cylch gwaith ein cydweithwyr yn Grŵp Strategaeth Meddyginiaethau Cymru Gyfan.

### **Beth yw Panel Arfarnu Technoleg Iechyd Cymru?**

Bydd HTW yn cynnal hyd at chwe chyfarfod Panel Arfarnu y flwyddyn.

Mae'r Panel Arfarnu yn ystyried yr achos dros fabwysiadu technolegau nad sy'n feddyginiaeth a atgyfeirir at HTW ar gyfer eu harfarnu yng nghyd-destun GIG Cymru, a bydd yn cynhyrchu canllaw HTW. Mae'r Panel Arfarnu hefyd yn ein helpu i nodi

pynciau pwysig, yn arfarnu'r pwy sy'n defnyddio'r canllawiau ac yn hwyluso ymgysylltu â rhanddeiliaid.

Mae tua 26 aelod ar Banel Arfarnu HTW. Mae'r aelodau'n cynnwys uwch gynrychiolwyr o bob bwrdd iechyd yng Nghymru ynghyd â rhanddeiliaid allweddol eraill, sy'n cynnwys nifer o grwpiau gwasanaeth iechyd cenedlaethol, diwydiant a phrifysgolion. Mae partneriaid cyhoeddus HTW hefyd yn eistedd ar y pwyllgor er mwyn sicrhau bod barn y cyhoedd yn cael ei ystyried pan wneir penderfyniadau. Mae'r gymysgedd hon o gefndiroedd yn cynorthwyo i sicrhau bod canllawiau HTW yn cael eu llywio gan ystod eang o safbwyntiau.

Cynhelir y Panel Arfarnu drwy gyfrwng y Saesneg.

I gael rhagor o wybodaeth am y Panel Arfarnu a'n Proses Arfarnu, ewch i'n gwefan: <http://www.healthtechnology.wales/about/appraisal-panel>

### **Pa wybodaeth fydd yn cael ei hasesu yn y cyfarfod?**

Cyfarfod y Panel Arfarnu yw rhan olaf proses asesu HTW. Ar gyfer pob eitem o dechnoleg sy'n cael ei hystyried, bydd aelodau'r Panel Arfarnu yn trafod ac yn adolygu'r holl dystiolaeth. Mae hyn yn cynnwys: y cynnyrch adolygiad tystiolaeth a barn arbenigwyr clinigol, sefydliadau cleifion, gwneuthurwyr ac eraill a gyflwynwyd yn ystod y broses adolygu gan gymheiriaid. Bydd y grŵp hefyd yn ystyried yr holl wybodaeth hon wrth baratoi Canllaw HTW.

### **Presenoldeb y cyhoedd mewn cyfarfodydd Panel Arfarnu HTW**

O fis Tachwedd 2019 cynhelir ein cyfarfodydd yn gyhoeddus. Mae hyn yn cefnogi ein hymrwymiad i fod yn agored a thryloyw. Gobeithiwn y bydd yn helpu pobl i ddeall sut yr ydym yn ystyried tystiolaeth cyn cyhoeddi Canllaw sy'n amlinellu a yw Panel Arfarnu HTW, yn seiliedig ar y dystiolaeth, yn cefnogi mabwysiadu'r dechnoleg iechyd sy'n cael ei hystyried yng Nghymru ai peidio.

Gall hyd at 10 o aelodau'r cyhoedd fynychu pob Panel Arfarnu fel sylwedyddion, gyda dim mwy na dau unigolyn o bob sefydliad. Os bydd cyfarfod wedi'i ordanysgrifio, rhoddir blaenoriaeth i aelodau'r cyhoedd a grwpiau budd cleifion, yn ogystal â gwneuthurwyr y dechnoleg a drafodir.

Cyhoeddir agenda'r cyfarfod ar y wefan pum diwrnod gwaith cyn y cyfarfod.

### **Pwy all fod yn sylwedyddion o blith y cyhoedd?**

Sylwedyddion o blith y cyhoedd yw'r rheini sy'n dod i wyllo cyfarfod Panel Arfarnu HTW ond sydd ddim yn uniongyrchol gysylltiedig â busnes y cyfarfod.

Efallai y bydd y sylwedyddion hyn yn cynnwys:

- aelodau o'r cyhoedd
- aelodau o'r wasg
- cynrychiolwyr o'r diwydiannau fferyllol neu ofal iechyd
- cynrychiolwyr o sefydliadau cleifion, gofalwyr a'r sector gwirfoddol

Gall sylwedyddion o blith y cyhoedd wrando ar fusnes y cyfarfod, ac eithrio pan fo gwybodaeth gyfrinachol yn cael ei thrafod. Fodd bynnag, ni chânt gymryd rhan yn y trafodaethau, gofyn cwestiynau na phleidleisio, na datgan eu barn wrth aelodau'r Panel Arfarnu.

### **Pwy arall fydd yn y cyfarfod?**

Yn ogystal ag aelodau Panel Arfarnu HTW, bydd aelodau staff sy'n rhan o gynnal a chefnogi'r cyfarfod yn bresennol.

Gyda chaniatâd Cadeirydd Panel Arfarnu HTW, efallai y bydd y bobl ganlynol hefyd yn bresennol:

- Cleifion neu arbenigwyr lleyg
- Arbenigwyr clinigol neu dechnegol
- Cynrychiolwyr y gwneuthurwr neu gynrychiolwyr allanol eraill
- Sylwedyddion eraill sydd wedi'u gwahodd

### **Pryd a lle cynhelir cyfarfodydd?**

Mae calendr o ddyddiadau'r Panel Arfarnu yn y dyfodol i'w weld ar wefan HTW.

Cynhelir y rhan fwyaf o gyfarfodydd yn yr Hyb Gwyddorau Bywyd, Bae Caerdydd. Fel arfer bydd cyfarfodydd yn digwydd rhwng 1-4pm (yn fras). Fodd bynnag, gwnewch yn siŵr eich bod yn gwirio'r manylion y cyfarfod penodol yr ydych am ei fynychu, oherwydd weithiau gall hyn amrywio rhwng cyfarfodydd.

Os bydd cyfarfod yn cael ei ganslo, neu os bydd amser a/neu leoliad y cyfarfod yn newid, cyhoeddir y manylion hyn ar wefan HTW a byddwn yn rhoi gwybod i chi cyn gynted â phosibl.

### **Sut allaf i gofrestru i fynychu cyfarfod Panel Arfarnu?**

Gallwch gofrestru i fynychu cyfarfod ar wefan HTW hyd at 20 diwrnod gwaith cyn y bydd yn digwydd. Bydd cofrestru fel arfer yn cau 10 diwrnod cyn dyddiad y cyfarfod. Bydd hyd at 10 lle ar gael. Pan fydd cyfarfodydd wedi'u gordanysgrifio, efallai y bydd angen i HTW gyfyngu ar nifer y lleoedd y gallwn eu cynnig.

Ni allwn gadw lle na dderbyn archebion bloc i arsylwi ar gyfarfodydd Panel Arfarnu. Llenwch y ffurflen gofrestru ar-lein ar wefan HTW i wneud cais i arsylwi ar gyfarfod penodol. A fyddech cystal â nodi na fydd hi'n bosibl derbyn ceisiadau hwyr i gofrestru.

### **Pryd ddylwn i gyrraedd a beth fydd yn digwydd pan fyddaf yn cyrraedd y cyfarfod?**

Cyrhaeddwch yn brydlon 15 munud cyn dechrau'r cyfarfod. Pan fyddwch yn cyrraedd croesewir chi gan gydlynnydd y cyfarfod, a fydd yn esbonio sut y bydd y cyfarfod yn gweithio. Cydlynnydd y cyfarfod fydd eich pwynt cyswllt drwy gydol y prynhawn. Bydd ef neu hi yn ymdrin ag unrhyw ymholiadau a allai fod gennych. Ni

fydd cyfarfodydd Panel Arfarnu yn cael eu hoedi ar gyfer hwyrddyfodiaid. Er mwyn cadw achosion o darfu i gyn lleied â phosibl, efallai na chaiff hwyrddyfodiaid fynediad i'r cyfarfod nes bydd toriad addas.

### **A oes angen i mi aros ar gyfer y cyfarfod cyfan?**

Mae cyfarfodydd pwyllgor yn amrywio mewn hyd yn dibynnu ar y pynciau a drafodir. Mae hyn yn ei gwneud hi'n anodd rhagweld pa mor hir a gymer i drafod pob pwnc a phryd y bydd cyfarfod yn dod i ben. Bydd y Cadeirydd yn amlinellu'r agenda ar gyfer y dydd ar ddechrau'r cyfarfod, ac efallai y bydd yn rhoi rhyw syniad o pryd y trafodir rhai pynciau penodol.

Rhennir y cyfarfod yn ddwy ran, gyda'r pynciau yn cael eu trafod yn yr hanner cyntaf. Bydd ail ran y cyfarfod yn ymdrin â busnes mwy cyffredinol y pwyllgor, ac ni fydd ar agor i sylwedyddion o blith y cyhoedd.

Er mwyn cadw unrhyw darfu i gyn lleied â phosibl gofynnwn i aelodau o'r cyhoedd sy'n sylwedyddion, lle bo hynny'n bosibl, i adael yn ystod toriad addas. Fodd bynnag, os oes angen gadael y cyfarfod yn gynnar, gofynnwn i chi wneud hynny'n dawel.

### **A ddarperir lluniaeth?**

Darperir te, coffi a dŵr yn yr ardal a glustnodir ar gyfer sylwedyddion o blith cyhoedd yn yr ystafell gyfarfod. Peidiwch â dod â bwyd i'r ystafell gyfarfod.

### **Pa mor hir fydd y cyfarfod yn para?**

Bydd y Cadeirydd yn amlinellu'r agenda ar gyfer y dydd ar ddechrau'r cyfarfod. Gall y cyflwyniad a'r drafodaeth gymryd hyd at 60 munud ar gyfer pob technoleg, fodd bynnag mae'n anodd gwybod pa mor hir a gymer i drafod pob technoleg neu pryd fydd cyfarfod yn gorffen. Amserlennir cyfarfodydd Panel Arfarnu HTW i redeg am 3 awr. Yn dibynnu ar swm y busnes a'r trafodaethau, gall cyfarfodydd orffen ychydig yn gynt neu'n hwyrach.

### **A oes angen i mi roi gwybod i chi os ydw i wedi cofrestru i arsylwi ac nad ydw i'n gallu mynychu mwyach?**

Rhowch wybod i gydlynnydd y cyfarfod cyn gynted â phosibl os na allwch fynychu'r cyfarfod. Nifer cyfyngedig o leoedd sydd ar gael i'r cyhoedd fynychu a thrwy anfon eich ymddiheuriadau gyda chymaint o rybudd ymlaen llaw â phosibl gellir rhoi eich lle i rywun arall.

### **Pa gyfleusterau sydd ar gael ar gyfer pobl sydd ag anableddau?**

Gall defnyddwyr cadair olwyn gael mynediad uniongyrchol i'r lleoliad o'r stryd. Fodd bynnag, oherwydd rheoliadau diogelwch yr adeilad a bennwyd gan y gwasanaeth tân, cyfyngir ar nifer y bobl sydd ag anawsterau symudedd y gallwn ddarparu ar eu cyfer mewn cyfarfodydd. Os ydych yn ddefnyddiwr cadair olwyn neu os oes gennych anawsterau cerdded, cysylltwch â chydlynnydd y cyfarfod fel y gallwn sicrhau bod cefnogaeth briodol wedi'i threfnu.

Mae dolen sain wedi'i gosod yn yr ystafell bwyllgor ar gyfer pobl sydd â nam ar eu clyw. Rhowch wybod i ni ymlaen llaw os bydd angen i chi ei defnyddio.

### **A all plant fynychu cyfarfodydd?**

Ni all plant dan 16 oed fynychu cyfarfodydd.

### **A ddarperir papurau fel y gall sylwedyddion o blith y cyhoedd ddilyn y cyfarfod?**

Mae'r pynciau yr ymdrinnir â hwy i'w gweld ar wefan HTW 20 diwrnod gwaith cyn dyddiad y cyfarfod. Mae gwybodaeth gefndir am y pwnc sy'n cael ei drafod hefyd i'w chael ar wefan HTW. Mae croeso i chi lawrlwytho'r rhain a dod â hwy i'r cyfarfod.

Os bydd angen, darperir pecyn gwybodaeth i chi sy'n cynnwys agenda a chopïau o'r Adroddiad Archwilio Pwnc cryno ar gyfer pob technoleg. Ni ddylid mynd â'r pecyn hwn o'r ystafell gyfarfod a rhaid ei ddychwelyd i gydlynnydd cyfarfod Panel Arfarnu HTW ar ddiwedd y cyfarfod. Mae hyn oherwydd y gall fod gwybodaeth gyfrinachol yn y gwaith papur sydd ddim yn ddogfennau terfynol ac efallai y caiff y manylion sydd ynddynt eu diwygio yn dilyn cyfarfod y Panel Arfarnu.

Oherwydd bod y papurau eraill yn nifer o dudalennau o hyd ac yn aml yn cynnwys gwybodaeth gyfrinachol (masnachol, academaidd neu fel arall), ac mewn rhai achosion gwybodaeth bersonol a sensitif, ni allwn ddarparu'r rhain ar gyfer sylwedyddion o blith y cyhoedd.

Bydd gofyn i holl aelodau'r cyhoedd sy'n sylwedyddion arwyddo cytundeb cyfrinachedd pan fyddant yn mynychu Panel Arfarnu HTW.

### **A fyddaf yn gallu gwrando ar yr holl drafodaethau?**

Mae HTW wedi ymrwymo'n llwyr i gynnal ei gyfarfodydd yn gyhoeddus a hoffem i gymaint â phosibl o'r cyfarfod ddigwydd gyda'r cyhoedd yn bresennol.

Fodd bynnag, efallai y bydd adegau pan fo peth o'r wybodaeth y mae angen i'r Panel Arfarnu ei thrafod fod yn gyfrinachol. Os felly, gofynnir i'r holl sylwedyddion o blith y cyhoedd adael yr ystafell tra bod y trafodaethau hyn yn digwydd.

Mae gwybodaeth sydd wedi'i nodi'n gyfrinachol yn cynnwys gwaith academaidd neu bolisi cyfrinachol, tystiolaethau personol cleifion ac arbenigwyr lleyg (os mai dyna ddymuniad y claf neu'r arbenigwyr lleyg) a gwybodaeth a elwir yn "commercial in confidence". Golyga hyn y gallai datgelu'r wybodaeth hon i'r cyhoedd gael effaith ar fuddiannau masnachol y cwmni penodol neu fudd academaidd ymchwil neu sefydliad proffesiynol, neu fudd polisi y llywodraeth.

Gofynnir i sylwedyddion o blith y cyhoedd hefyd adael yr ystafell pan gynhelir trafodaethau terfynol i gadarnhau'r canllaw.

Rhennir y cyfarfod yn ddwy ran, gyda'r pynciau yn cael eu trafod yn yr hanner cyntaf. Bydd ail ran y cyfarfod yn ymdrin â busnes mwy cyffredinol y pwyllgor, ac ni fydd ar agor i sylwedyddion o blith y cyhoedd.

### **A allaf siarad ag aelodau'r Panel Arfarnu?**

Rôl aelodau Panel Arfarnu HTW yw gwneud asesiad annibynnol o'r dystiolaeth. Mae'n bwysig iawn nad oes unrhyw un yn ceisio dylanwadu ar aelod unigol yn ystod y cyfarfod, yn ystod egwylion neu tu allan i'r cyfarfod ynglŷn ag unrhyw bynciau sy'n cael eu trafod. Os oes gennych unrhyw gwestiynau gall cydlynnydd cyfarfod Panel Arfarnu HTW eich helpu.

### **A allaf siarad â'r arbenigwyr allanol sy'n cyflwyno tystiolaeth i gyfarfod y pwyllgor?**

Unwaith eto, gofynnwn i sylwedyddion o blith y cyhoedd gyfeirio unrhyw gwestiynau sydd ganddynt at gydlynnydd y cyfarfod yn y man cyntaf yn hytrach na mynd yn uniongyrchol at yr arbenigwyr allanol.

Mae'r arbenigwyr allanol yn gwirfoddoli eu hamser i fynychu cyfarfodydd pwyllgor. Mae'n rhaid iddynt dreulio amser yn paratoi'r hyn y maent am ei ddweud wrth y pwyllgor ac maent yn canolbwyntio ar y busnes dan sylw. Hefyd, gall arbenigwyr cleifion, aelodau lleyg a defnyddwyr gwasanaeth deimlo bod cyfarfodydd yn straen wrth iddynt ddatgelu eu profiad personol ynglŷn â salwch neu gyflwr penodol. Rôl yr arbenigwyr yw rhoi eu barn broffesiynol i'r pwyllgor ynglŷn â salwch neu gyflwr a'r driniaeth neu'r ymyrraeth sy'n cael ei hystyried ac mae'n bwysig nad oes unrhyw un yn ceisio dylanwadu ar arbenigwr unigol.

### **A allaf gymryd nodiadau yn y cyfarfod?**

Gallwch gymryd nodiadau, ond ni chaniateir defnyddio gliniaduron neu ddyfeisiau electronig eraill yn ystod y cyfarfod. Rhaid diffodd pob ffôn symudol, gliniadur a thabled yn ystod y cyfarfod. Cyhoeddir cofnodion y cyfarfod ar y wefan unwaith eu bod wedi'u cymeradwyo gan y grŵp.

Ni chaniateir recordio sain neu fideo, tynnu lluniau neu ddefnydd arall o gyfryngau cymdeithasol yn ystod y cyfarfod. Os gwelir unrhyw un yn recordio/darlledu yn ystod cyfarfod gofynnir iddynt adael ar unwaith.

### **A allaf i ddyfynnu neu adrodd am yr hyn a ddywedwyd mewn cyfarfod?**

Cyfarfod cyhoeddus yw hwn a gellir dyfynnu'r hyn a ddywedwyd aelodau wedi'r cyfarfod. Rydym yn dibynnu ar rannu barn yn llawn ac agored er mwyn cyflawni ein gwaith a bydd aelodau'r grŵp yn trafod y dystiolaeth yn drylwyr. Gofynnwn i'r cyhoedd barchu ei bod hi'n bwysig bod aelodau yn gallu siarad yn rhydd heb bryder y gallant gael eu camddyfynnu neu fod rhywbeth a ddywedwyd ganddynt yn cael ei adrodd mewn cyd-destun gwahanol.

### **A allaf ddefnyddio cyfryngau cymdeithasol yn ystod y cyfarfod?**

Ni chaniateir adrodd yn fyw ar weithdrefnau cyfarfod gan y gallai hynny beri risg fasnachol. Os gwelir eich bod yn darlledu'r cyfarfod drwy unrhyw gyfryngau gofynnir i chi adael.

### **A allaf gynnal astudiaeth ymchwil ar y cyfarfod a/neu Banel Arfarnu HTW?**

Os ydych chi wedi cofrestru i fynychu, ac am gynnal astudiaeth ar y cyfarfod a/neu brosesau Panel Arfarnu HTW, cysylltwch â chydlynnydd y cyfarfod. Bydd angen i chi ddarparu manylion diben a chyd-destun eich astudiaeth a'r wybodaeth yr ydych yn bwriadu ei chasglu. Yna rhoddir y wybodaeth hon i Gyfarwyddwr HTW ar gyfer cysyniad. Hysbysir chi ynglŷn â phenderfyniad Panel Arfarnu HTW drwy e-bost. Os nad yw'n bosibl i chi gynnal eich astudiaeth ymchwil byddwch yn dal i allu arsylwi yn y cyfarfod, fodd bynnag ni chewch gynnal unrhyw ymchwil yn y cyfarfod. Os nad ydych yn dymuno mynychu'r cyfarfod mwyach, rhowch wybod i gydlynnydd y cyfarfod fel y gellir cynnig eich lle i rywun arall.

### **Beth fydd yn digwydd os bydd sylwedydd o blith y cyhoedd yn ceisio tarfu ar y cyfarfod?**

Rydym yn disgwyl i bawb sy'n dod i gyfarfod barchu gwaith y grŵp ac i beidio â tharfu o gwbl. Os bydd unrhyw un yn tarfu, bydd y cyfarfod yn cael ei atal ac efallai y bydd y Cadeirydd yn mynnu bod yr unigolyn yn gadael cyn ailddechrau.

Efallai y byddwn hefyd yn atal sylwedyddion o blith y cyhoedd sy'n tarfu rhag mynychu unrhyw gyfarfodydd yn y dyfodol.

### **A oes rheoliadau ar gyfer aelodau o'r cyfryngau sy'n cofrestru i fynychu cyfarfod?**

Bydd aelod o dîm cyfathrebu HTW yn mynychu cyfarfodydd pan fo aelodau o'r cyfryngau yn bresennol a bydd yn rhoi sesiwn frifffio. Os oes gennych ymholiadau yn ymwneud â'r cyfryngau, cysylltwch â Dewi Powell yn HTW.

Dylid gwneud ceisiadau am gyfweiliadau cyfryngau drwy dîm cyfathrebu HTW. Caiff unrhyw gais arall ei wrthod yn awtomatig. Mae'n annhebygol y cynhelir cyfweiliadau cyfryngau gyda staff HTW neu aelodau'r pwyllgor yn syth wedi'r cyfarfod, oherwydd trefniadau teithio a fydd eisoes wedi'u gwneud. Fodd bynnag, bydd tîm cyfathrebu HTW yn ceisio canfod amser a lleoliad addas ar ddyddiad arall yn y dyfodol. Dylid cynnal cyfweiliadau gydag arbenigwyr allanol yn rhywle sydd ddim yn eiddo HTW.

### **A gyhoeddir y Canllaw yn y cyfarfod?**

Na. Bydd Panel Arfarnu HTW yn ceisio cwblhau ei Ganllaw yn ystod y cyfarfod. Fodd bynnag, weithiau efallai y bydd aelodau Panel Arfarnu HTW yn gwneud cais i ystyried y cyngor drafft unwaith eto. Ni fydd Canllaw terfynol y Panel Arfarnu yn dod yn gyhoeddus nes y cyhoeddir y Canllaw ar ein gwefan. Y rheswm am hyn yw nad yw'r gwaith papur sy'n ymwneud â'r cyfarfod yn gyfystyr â Chanllaw terfynol a bydd yn cael ei ddiweddarau wedi'r cyfarfod.

**Pryd fydd cyngor terfynol Panel Arfarnu HTW yn cael ei gyhoeddi?**

Cyhoeddir Canllaw Panel Arfarnu HTW ar y wefan tua 4 wythnos wedi'r cyfarfod pan gafodd ei ystyried. Hyd nes yr adeg honno mae trafodaethau'r cyfarfod a drafftiau yn gyfrinachol. Yna dosberthir Canllaw Panel Arfarnu HTW ar draws GIG Cymru.

**Adborth a gwerthuso**

Byddwch yn derbyn dolen i arolwg ar-lein wedi'r cyfarfod yn gofyn am eich barn am y profiad o arsylwi ar Banel Arfarnu HTW. Rydym yn eich annog i roi adborth gonest er mwyn ein helpu i adolygu, datblygu a gwella'r broses hon.

**Os oes gennych unrhyw gwestiynau eraill ynglŷn â mynychu cyfarfod Panel Arfarnu HTW mae croeso i chi gysylltu drwy [healthtechnology@wales.nhs.uk](mailto:healthtechnology@wales.nhs.uk)**